



Broj: 05-849-7/21
Sarajevo, 06.08.2021. godine

Na osnovu člana 23. stav (1) tačka d) Zakona o Agenciji za bankarstvo Federacije BiH („Službene novine Federacije BiH“, broj 75/17), člana 16. stav (1) tačka j) Statuta Agencije za bankarstvo Federacije BiH („Službene novine Federacije BiH“, broj 3/18), člana 69. stav (3) i člana 70 stav (4) Zakona o javnim nabavkama („Službeni glasnik BiH“ broj 39/14), direktor Agencije za bankarstvo Federacije BiH donio je

ODLUKU **o poništenju postupka javne nabavke usluga**

I.

Poništava se postupak javne nabavke usluga fizičke i tehničke zaštite poslovnih prostorija Agencije za bankarstvo Federacije BiH po Pozivu i Izmeni poziva za dostavu ponuda u postupku nabavke usluga fizičke i tehničke zaštite poslovnih prostorija, broj nabavke: 05-849/21 iz razloga koji se nisu mogli predvidjeti u vrijeme pokretanja postupka javne nabavke predviđenih članom 68. stav (3) Zakona o javnim nabavkama.

II.

U skladu s članom 70. stav (6) Zakona o javnim nabavkama, ugovorni organ objavit će ovu odluku na svojoj internetskoj stranici www.fba.ba, istovremeno s upućivanjem iste ponuđačima koji su učestvovali u ovom postupku javne nabavke.

O b r a z l o ž e n j e

Agencija za bankarstvo Federacije BiH (u daljem tekstu: Agencija) je dana 16.03.2021. godine na svojoj web stranici objavila Poziv za dostavu ponuda u postupku nabavke usluga fizičke i tehničke zaštite poslovnih prostorija (u daljem tekstu: Poziv), a u skladu sa članom 8. Zakona o javnim nabavkama i Pravilnikom o postupku dodjele ugovora o uslugama iz Aneksa II. dio B Zakona o javnim nabavkama („Službene novine BiH“, broj: 66/16).

Dana 22.03.2021. Agencija je na svojoj web stranici objavila Izmjenu poziva za dostavu ponuda u postupku nabavke usluga fizičke i tehničke zaštite poslovnih prostorija, a koja izmjena se nije odnosila na suštinsku izmjenu Poziva.

Pozivom za dostavljanje ponuda propisan je krajnji rok za dostavljanje ponuda i to do 31.03.2021. godine do 10:00 sati, a propisani period važenja ponuda bio je 60 (šezdeset) dana računajući od isteka roka za podnošenje ponuda.

Dana 30.03.2021. godine Agencija za zaštitu ljudi i imovine „Securitas BH“ d.o.o. Sarajevo kao zainteresirani ponuđač dostavila je žalbu na tendersku dokumentaciju.

N

Po prijemu predmetne žalbe, u skladu s čl. 97. i 100. Zakona o javnim nabavkama, a vezi sa članom 101. stav (1) tačka b) istog Zakona, utvrđeno je da je žalba blagovremena, dozvoljena i izjavljena od ovlaštenog lica, čime su ispunjene procesne pretpostavke za razmatranje iste.

Ugovorni organ - Agencija je, nakon razmatranje žalbe, istu ocijenio kao neosnovanu, te predmetni postupak s kompletnom dokumentacijom prosljedio Uredu za razmatranje žalbi BiH, Filijala/Podružnica Mostar, na nadležno postupanje dana 01.04.2021. godine.

Ured za razmatranje žalbi je Rješenjem broj: JN2-03-07-1-950-7/21 od 23.07.2021. godine žalbu ponuđača Agencija za zaštitu ljudi i imovine „Securitas BH“ u potpunosti odbio kao neosnovanu. Rješenjem je utvrđeno i zaključeno da Agencija nije narušila konkurenciju među ponuđačima, niti onemogućila učešće u predmetnom postupku nabavke niti jednom ponuđaču, niti onemogućila aktivnu i pravičnu konkurenciju među ponuđačima, te da nabavku nije prilagodila samo jednom ponuđaču.

Članom 69. stav (3) Zakona o javnim nabavkama propisano je:

(3) Ugovorni organ može otkazati postupak javne nabavke samo zbog dokazanih razloga koji su izvan kontrole ugovornog organa i koji se nisu mogli predvidjeti u vrijeme pokretanja postupka javne nabavke.

Temeljem navedene odredbe, iz razloga proteka dužeg vremenskog perioda od dana ulaganja žalbe i obustavljanja postupka po predmetnom javnom pozivu do dostave rješenja Ureda za razmatranje žalbi, što je dovelo do izmjene objektivnih okolnosti na koje ugovorni organ nije mogao uticati, te iz razloga isteka, javnim pozivom propisanog, roka perioda važenja ponuda (60 dana računajući od isteka roka za podnošenje ponuda – to jeste do 31.05.2021. godine), s obzirom na promijenjene objektivne okolnosti koje se nisu mogle predvidjeti, odlučeno je da se postupak javne nabavke predmetnih usluga poništi.

Uzimajući u obzir sve navedeno, donijeta je odluka kao u dispozitivu.

Pouka o pravnom lijeku:

Protiv ove odluke može se izjaviti žalba u roku od 10 (deset) dana od dana prijema ove odluke. Žalba se izjavljuje ugovornom organu — Agenciji za bankarstvo Federacije BiH u pisanoj firmi, direktno, elektronskim putem ili preporučenom poštanskom pošiljkom. Žalbu je potrebno podnijeti u dovoljnom broju primjeraka koji ne može biti manji od 3 (tri).

**DIREKTOR**
Jasmin Mahmuzić

Dostaviti:

- učesnicima u postupku
- a.a.

